

## REGLUGERÐ

### um innheimtu gjalda til Framleiðsluráðs landbúnaðarins og Stofnlánadeildar landbúnaðarins.

#### 1. gr.

Greiða skal gjald til Framleiðsluráðs landbúnaðarins af heildsöluverði búvara skv. lögum nr. 46 27. júní 1985, um framleiðslu, verðlagningu og sölu á búvörum. Gjald þetta skal vera 0,25% af gjaldstofni.

Greiða skal gjald til Stofnlánadeildar landbúnaðarins af heildsöluverði búvara skv. lögum nr. 45 16. apríl 1971 um Stofnlánadeild landbúnaðarins, landnám, ræktun og byggingar í sveitum, ásamt síðari breytingum. Gjald þetta, neytenda- og jöfnunargjald, skal vera 2% af gjaldstofni.

Til heildsöluverðs skv. framansögðu teljast niðurgreiðslur ríkissjóðs sem kunna að vera greiddar á hverjum tíma til lækkunar á heildsöluverði til smásala eða eru greiddar beint til framleiðenda.

Fimmannanefnd, sem ákveður heildsöluverð, sbr. IV. kafla laga nr. 46/1985, reiknar hvert gjaldið skuli vera, skv. upplýsingum Framleiðsluráðs landbúnaðarins, þegar nefndin ákveður heildsöluverð búvöru. Framleiðsluráð reiknar gjaldið af þeim búvörum sem ekki eru undir verðákvörðun fimmannanefndar. Leita skal staðfestingar landbúnaðarráðherra á útreikningum gjaldsins.

#### 2. gr.

Gjaldskyldar vörur skv. 1. gr. eru:

- a) nautgripaafurðir og lifandi nautgripir til útflutnings.
- b) sauðfjárafurðir og lifandi fé til útflutnings.
- c) afurðir svína.
- d) afurðir alifugla.
- e) afurðir hrossa og lifandi hross til útflutnings.
- f) garð- og gróðurhúsaafurðir hvers konar, þ.m.t. trjáplöntur og runnar til skrudgarðyrkju.
- g) loðdýraafurðir og lifandi loðdýr til útflutnings.
- h) afurðir kanína og lifandi kanínur til útflutnings.
- i) skógarafurðir hvers konar nema trjáplöntur til skógræktar.
- j) æðardúnn.

#### 3. gr.

Gjöld þau sem um ræðir í 1. gr., greiðast af þeim viðskiptaaðilum sem kaupa eða taka við vörunum frá framleiðendum sem milliliður að smásölu dreifingu. Þeir framleiðendur sem selja vöru sína án milliliða til neytenda eða til smásölu aðila, skulu standa skil á gjöldunum. Framleiðsluráð landbúnaðarins annast innheimtu gjaldanna.

Skylt er gjaldskyldum viðskiptaaðilum að skila innheimtuaðila staðfestri skýrslu um sölumagn gjaldskyldra afurða, sem um ræðir í 2. gr., fyrir 10. hvers mánaðar fyrir næstliðinn mánuð ásamt upplýsingum um heildsöluverð afurðarinnar, ef það er ekki ákveðið af fimmannanefnd.

Gjaldskyldir framleiðendur skulu skila innheimtuaðila skýrslu um sölumagn gjaldskyldra afurða fyrir 10. hvers mánaðar, fyrir næstliðinn mánuð ásamt upplýsingum um söluverðmæti ef heildsöluverð afurðar er ekki ákveðið af fimmannanefnd.

Innheimtuaðili lætur gera eyðublöð fyrir mánaðarskýrslur skv. framansögðu og sendir gjaldskyldum aðilum þau, þeim að kostnaðarlausu.

Innheimtuaðili getur heimilað einstökum framleiðendum búvara að skila einni skýrslu fyrir verðlagsárið og innheimt gjöldin samkvæmt henni.

Innheimtuaðili getur heimilað þeim framleiðendum sem hafa með höndum árstíða-bundna vöru eða sölu í landbúnaði að skila skýrslu að loknu hverju sölutímabili og innheimt gjöldin samkvæmt henni.

#### 4. gr.

Á grundvelli skýrslna skv. 3. gr. reiknar innheimtuaðili út gjöld skv. 1. og 2. gr. og tilkynnir gjaldskyldum aðilum um álögð gjöld fyrir næstliðinn mánuð eigi síðar en 25. hvers mánaðar, sem er jafnframt gjalddagi gjaldanna.

Við útreikning á gjöldum af sláturafurðum skal reikna þau á kíló kjöts að viðbættu verðmæti sláturs og húða, skinna eða gæra, eftir því sem við á. Framleiðsluráð gefur fimmannanefnd upplýsingar um hlutfallslega hækkun á kíló kjöts sem nefndin verðleggur í heildsölu, vegna framangreindra viðbótarverðmæta.

Séu gjöldin ekki greidd innan mánaðar frá gjalddaga skal innheimta dráttarvexti af því sem gjaldfallið er. Dráttarvextir skulu reiknast hinir sömu og hjá innlánsstofnunum, skv. 13. gr. laga nr. 10 29. mars 1961 og ákvörðun Seðlabanka Íslands á hverjum tíma. Framleiðsluráðsgjald og neytenda- og jöfnunargjald má taka lögtaki.

#### 5. gr.

Ef gögn um viðskipti með gjaldskyldar vörur eða þjónustu þykja að mati innheimtuaðila ófullnægjandi, eða gjaldskyldur aðili skilar ekki skýrslum skv. 3. gr., skal innheimtuaðili skora á viðkomandi aðila að bæta úr því innan ákveðins tíma og láta í té skriflegar skýringar og gögn. Fáir innheimtuaðili fullnægjandi skýringar og gögn innan tiltekins tíma skulu gjöldin ákvörðuð og innheimt í samræmi við þau.

Berist svar við áskorun skv. 1. mgr. ekki innan tiltekins tíma eða ef skýringar eða gögn eru ófullnægjandi, er innheimtuaðila heimilt að áætla gjöldin og innheimta þau skv. þeirri áætlun. Senda skal skriflega tilkynningu til greiðanda gjaldanna um áætlunina. Telji greiðandi áætlunina ranga, getur hann innan 20 daga frá og með póstsendingardegi tilkynningar um áætlun gjaldanna krafist þess skriflega að innheimtuaðili taki áætlunina til endurskoðunar. Skal sú krafa rökstudd með söluskram eða öðrum nauðsynlegum gögnum. Innheimtuaðili skal innan eins mánaðar frá lokum þessa frests gera greiðanda skriflega grein fyrir afgreiðslu á kröfu hans. Heimilt er greiðanda að skjóta lokaafgreiðslu innheimtuaðila til landbúnaðarráðherra og skal skrifleg og rökstudd beiðni þar um hafa borist ráðherra innan 30 daga frá póstlagningu lokaafgreiðslu.

Beiðni um endurskoðun á áætlun gjaldanna eða deila um gjaldskyldu frestar ekki eindaga né leysir undan neinum viðurlögum, sem lögð eru við vangreiðslu þeirra. Ef gjöldin eru lækkuð samkvæmt afgreiðslu innheimtuaðila eða úrskurði ráðherra skal endurgreiðsla þegar fara fram.

#### 6. gr.

Landbúnaðarráðherra er heimilt að ákveða endurgreiðslu gjalda skv. 1. gr. eða niðurfellingu þeirra við útflutning afurða sem ekki njóta útflutningsbóta úr ríkissjóði.

## 7. gr.

Innheimtuaðila er heimilt að halda gjaldföllnum gjöldum skv. þessari reglugerð eftir hverju sinni þegar skil niðurgreiðslna eða útflutningsbóta úr ríkissjóði eða endurgreiðslur af hinu sérstaka kjarnfóðurgjaldi fara fram til viðkomandi aðila.

## 8. gr.

Framleiðsluráð landbúnaðarins greiðir mánaðarlega til Stofnlánadeildar landbúnaðarins innheimt neytenda- og jöfnunargjald auk vaxtatekna. Kostnað innheimtuaðila við innheimtu og endurskoðun greiðir Stofnlánadeild eftir reikningi.

Endurskoðendur Búnaðarbanka Íslands geta endurskoðað reikningsskil innheimtuaðila fyrir gjaldinu ef þurfa þykir og skal þeim heimill aðgangur að öllum þeim gögnum er gjöldin varða og innheimtuaðili getur í té látið.

## 9. gr.

Rísi ágreiningur um gjaldskyldu eða önnur atriði varðandi reglugerð þessa, sker landbúnaðarráðherra úr þeim ágreiningi.

## 10. gr.

Reglugerð þessi er sett skv. lögum nr. 46 27. júní 1985 um framleiðslu, verðlagningu og sölu á búvörum og lögum nr. 45 16. apríl 1971 með síðari breytingum og öðlast þegar gildi. Jafnframt falla úr gildi reglugerðir nr. 226 21. apríl 1986 um innheimtu gjalda til Framleiðsluráðs landbúnaðarins og nr. 627 11. nóvember 1982 um innheimtu gjalda til Stofnlánadeildar landbúnaðarins.

*Landbúnaðarráðuneytið, 28. desember 1990.*

**Steingrímur J. Sigfússon.**

*Jón Höskuldsson.*

**REGLUGERÐ**

**um breyting á mjólkurreglugerð nr. 35/1986, sbr. breytingu á reglugerð nr. 654/1989.**

## 1. gr.

1. tl. ákvæða til bráðabirgða til fullnustu ákvæða reglugerðarinnar orðist svo:
- Við fjós þar sem ekki eru fyrir hendi haughús, sbr. 17. gr. 5. tl. er mjólkurframleiðendum veittur frestur til 1. janúar 1992 til að fullnægja þeim ákvæðum.

## 2. gr.

Reglugerð þessi er sett með stoð í lögum nr. 81/1988, um hollustuhætti og heilbrigðiseftirlit, sbr. lög nr. 24/1936, um eftirlit með matvælum og öðrum nauðsynjavörum.

*Heilbrigðis- og tryggingamálaráðuneytið, 21. desember 1990.*

**Guðmundur Bjarnason.**

*Ingimar Sigurðsson.*